

Inatsisartut suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqutit:

1. Naalakkersuisut Siulittaasuat, Danmark-imi Naalakkersuisut (Regeringen) assigalugit, siornatigut soorlu Tartupalummut apeqqut pillugu nalunaaruteqarnikuuvoq, Nunap inoqqaavinik "Inuit" Kalaallit Nunaanni kinguaaqartoq. Taamatuttaaq Nunap inoqqaavisa "Inuit" kinguaavi Kalaallit Nunaanni inatsisitigut immikkut pisinnaatitaaffeqarnerinut ataasiaannaanngitsumik Naalakkersuisut, Danmark-imilu Naalakkersuisut (Regeringen) naqissusiinikuupput. Matumuuna pisinnaatitaaffiit taakkua pineqartut atuutsinneqarneri pillugit Naalakkersuisut itisileeqquneqarput, ilaatigut ukua ilanngullugit:
 - a. *Kalaallit Nunaanni inuiaqatigiisut akornanni, kikkut pisortatigoortumik Nunap inoqqaavisa "Inuit" kinguaavisut taaneqarpat, kikkullu taamatut taaneqarsinnaatitaappat?*
 - b. *Kalaallit Nunaanni pisinnaatitaaffiit suut immikkut Nunap inoqqaavisa "Inuit" kinguaavinut atuutsinneqarpat?*
 - c. *Pisinnaatitaaffiit taakkua pineqartunut pisorta qarfiusoq aamma/imaluunniit oqartussaasoqarfinni sorleq Nunatsinni akisussaasuunertut oqartussaassuseqarpa?*
2. Naalakkersuisut – *inuiannut tunngasut pillugit oqartussaassuseqartutut inissimasut, takuuk §12 Namminersornermut Inatsit* – Nunat Inoqqaavisa pisinnaatitaaffiinut Naalagaaffiit Peqatigiit nalunaarutaat 2007-imeersoq, Kalaallit Nunaanni suli pisinnaatitaaffittut atuutsinneqarnera akueraat?

(Inatsisartunut ilaasortaq Kuno Fencker, Siumut)

Tungavilersuut:

Inuiannut tunngasut pillugit ersarinngitsunik qisuariartoqartalerpoq, minnerunngitsumik Nunap inoqqaavi "Inuit" Kalaallit Nunaanni pisinnaatitaaffii pillugit. Naalakkersuisut, Danmark-imilu Naalakkersuisut (Regeringen), siornatigut Nunap inoqqaavinik "Inuit" Kalaallit Nunaanni inatsisitigut kinguaaqartoq naqissuserneerikuaat, kingullertigut § 37 apeqqutimut 1. juli 2022 akissuteqarnikkut, ILO-169 Nunat inoqqaavinut tunngasut inatsisinngortinneqarsimaneri najoqqutarineqarlutik. Najoqqutarineqartoq taanna naqissusiivoq, Kunngeqarfik Danmark-imi nunap inoqqaavisa kinguaavi ataasiinnaasut, tassalu "Inuit".

Danmark-imi Naalakkersuisut (Regeringen), taamanilu Namminersornerullutik Oqartussat, 2007-imi Naalagaaffiit Peqatigiit ataatsimeersuarnerani Nunat inoqqaavisa pisinnaatitaaffii pillugit akuersillutik taaseqataanikuupput, akuerimassuk resolution *United Nations Declaration on the Rights of indigenous Peoples*, naalisarlugu UNDRIP. Naalakkersuisut aamma Danmarkip Naalakkersuisui (Regeringen) taamanili UNDRIP atuutilerana naqissuserluarpaat, taamaasinermilu ersarissaqqiinnarlugu Nunat inoqqaavinik ataasiinnaasunik Kunngeqarfik Danmark-imi peqartoq, tassa "Inuit", innersuuteqatigalugu ILO-169.



Matumuuna 1997-imiilli ILO-169 inatsisngortinneqarneranili, kingornalu UNDRIP akuererneqarnera ilutigalugu, pisinnaatitaaffiit taakkua ukiut 25-it atuutsinneqareertillugit, uani apequtigineqartut inatsit malillugu ullut suliffiusut 10 iluanni kinguarsarneqanngitsumik akineqarnissaat naatsorsuutigineqarpoq.